

KENYATAAN AKHBAR

OLEH KETUA AUDIT NEGARA

BERKENAAN LAPORAN KETUA AUDIT NEGARA MENGENAI PENYATA KEWANGAN DAN PENGURUSAN KEWANGAN TAHUN 2013 SERTA AKTIVITI KERAJAAN PERSEKUTUAN, BADAN BERKANUN DAN KERAJAAN-KERAJAAN NEGERI SIRI 3

1. Mulai tahun 2013, Laporan Ketua Audit Negara Mengenai Aktiviti Kerajaan Persekutuan, Badan Berkanun Persekutuan dan Kerajaan-Kerajaan Negeri Tahun 2013 dibentangkan secara bersiri sebanyak 3 kali. Laporan Ketua Audit Negara Siri 1 dan 2 telah dibentangkan di Parlimen pada 7 April 2014 dan 16 Jun 2014.
2. Laporan Ketua Audit Negara Mengenai Penyata Kewangan Dan Pengurusan Kewangan Tahun 2013 Serta Aktiviti Kerajaan Persekutuan, Badan Berkanun Persekutuan Dan Kerajaan-Kerajaan Negeri Siri 3 pula akan dibentangkan di Parlimen pada 10 November 2014 (Isnin) selepas mendapat perkenan daripada Seri Paduka Baginda Yang di-Pertuan Agong. Pada hari yang sama, Jabatan Audit Negara akan memberi taklimat berhubung dengan isu-isu utama yang dibangkitkan dalam laporan tersebut kepada Ahli-ahli Jawatankuasa Kira-kira Wang Negara di Parlimen.
3. Laporan Ketua Audit Negara ini mengandungi perkara-perkara berikut:

3.1. Pengesahan Penyata Kewangan

- a) Ketua Audit Negara adalah bertanggungjawab mengesahkan sama ada penyata kewangan Kerajaan Persekutuan, Kerajaan-Kerajaan Negeri, Badan Berkanun Persekutuan, Badan Berkanun Negeri, Pihak Berkuasa Tempatan dan Majlis Agama Islam telah disediakan secara teratur mengikut piawaian perakaunan yang diterima pakai dan memberi

gambaran yang sebenar tentang kedudukan kewangan Kerajaan/agensi berkenaan. Setakat 10 November 2014, bilangan penyata kewangan yang perlu diaudit dan telah disahkan adalah seperti berikut:

| BIL. | PENYATA KEWANGAN | BILANGAN PENYATA KEWANGAN TAHUN 2013 | PENSIJILAN SETAKAT 10.11.2014 |
|---------------|----------------------------------|--------------------------------------|-------------------------------|
| 1. | Kerajaan Persekutuan | 1 | 1 |
| 2. | Kerajaan-kerajaan Negeri | 13 | 13 |
| 3. | Badan-badan Berkanun Persekutuan | 138 | 137 |
| 4. | Badan Berkanun Negeri | 150 | 137 |
| 5. | Pihak Berkuasa Tempatan | 147 | 147 |
| 6. | Majlis Agama Islam Negeri | 13 | 13 |
| JUMLAH | | 462 | 448 |

b) Berdasarkan kepada pengauditan terhadap 462 penyata kewangan Kerajaan dan agensi Kerajaan tahun 2013, sebanyak 416 penyata kewangan telah diberikan Sijil Audit Tanpa Teguran dan 12 Sijil Audit Berdasarkan *Emphasis of Matter*. Sebanyak 20 penyata kewangan pula telah diberikan Sijil Audit Berteguran kerana terdapat beberapa piawaian perakaunan yang tidak dipatuhi sepenuhnya. Baki 11 penyata kewangan masih dalam proses pengauditan dan sejumlah 3 penyata kewangan belum dikemukakan untuk pengauditan.

3.2. Pengauditan Pengurusan Kewangan (Indeks Akauntabiliti)

a) Mulai tahun 2007, Jabatan Audit Negara telah melaksanakan penilaian terhadap pengurusan kewangan sektor awam berdasarkan Sistem Penarafan yang berasaskan kepada Indeks Akauntabiliti (IA). Ia dilaksanakan bertujuan untuk

menilai sejauh mana pengurusan kewangan Kementerian/Jabatan Persekutuan/Kerajaan Negeri/Badan Berkanun Persekutuan/Badan Berkanun Negeri/Pihak Berkuasa Tempatan/Majlis Agama Islam telah mematuhi undang-undang dan peraturan kewangan Kerajaan. Aspek yang dinilai adalah Kawalan Pengurusan; Kawalan Bajet; Kawalan Terimaan; Kawalan Perbelanjaan; Pengurusan Akaun Amanah/Kumpulan Wang Amanah Dan Deposit; Pengurusan Aset Dan Stor; Pengurusan Pelaburan; Pengurusan Pinjaman serta Penyediaan dan Persembahan Penyata Kewangan.

- b) Penarafan tahap prestasi pengurusan kewangan (IA) dilaksanakan mengikut 2 kategori iaitu Kategori Wajib dan Kategori Giliran. Agensi yang diletakkan di bawah kategori wajib perlu dinilai prestasi kewangannya setiap tahun manakala agensi di bawah kategori giliran akan dinilai prestasi kewangannya setiap 3 tahun sekali. Agensi di peringkat Persekutuan dan Negeri yang **wajib dibuat penilaian prestasi** kewangan setiap tahun adalah seperti berikut:

| PERINGKAT PERSEKUTUAN | PERINGKAT NEGERI |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------|
| <ul style="list-style-type: none"> • Kerajaan Persekutuan <ul style="list-style-type: none"> i. 24 Kementerian ii.4 Jabatan pemungut hasil utama: <ul style="list-style-type: none"> - Jabatan Kastam Diraja Malaysia - Jabatan Imigresen Malaysia - Jabatan Pengangkutan Jalan - Polis DiRaja Malaysia • Pejabat Setiausaha Persekutuan di Negeri Sabah dan Sarawak • Majlis Agama Islam Wilayah Persekutuan | <ul style="list-style-type: none"> • 13 Pejabat Setiausaha Kerajaan Negeri • 13 Perbendaharaan Negeri • 13 Majlis Agama Islam Negeri • 13 Perbadanan Kemajuan Ekonomi Negeri |

c) Hasil Penarafan Indeks Akauntabiliti (IA) Bagi Tahun 2011 Hingga 2013

Pada keseluruhannya, Jabatan Audit Negara mendapati tahap prestasi pengurusan kewangan agensi bagi tahun 2013 adalah lebih baik dengan 194 Kementerian/Jabatan/Agensi yang mendapat penarafan **SANGAT BAIK (4 Bintang)** berbanding dengan 143 Kementerian/ Jabatan/Agensi pada tahun 2012 dan 111 pada tahun 2011. Pencapaian yang ketara ini menunjukkan pelaksanaan IA telah memberi dorongan kepada Pegawai Pengawal untuk mengambil tindakan penambahbaikan terhadap pengurusan kewangan.

3.3. Pengauditan Prestasi Terhadap Program/Aktiviti/Projek Kerajaan Di Peringkat Persekutuan dan Negeri

a) Setiap tahun, Jabatan Audit Negara menjalankan pengauditan prestasi yang bertujuan menilai sejauh mana pelbagai aktiviti dan projek Kerajaan telah dirancang,

dilaksanakan dan dipantau dengan cekap dan berkesan serta sejauh mana objektif asal program/aktiviti dan projek ini telah tercapai. Ia juga bertujuan untuk menilai sejauh mana wang awam telah dibelanjakan dengan berhemat tanpa pemborosan dan pembaziran serta mendapat *best value for money*.

- b) Bagi Siri 3, sebanyak 62 pengauditan prestasi dan 22 pengauditan pengurusan Syarikat Kerajaan telah dilaksanakan di peringkat Persekutuan dan Negeri. Pengauditan yang dilaksanakan merangkumi bidang pembinaan, penyenggaraan, penguatkuasaan undang-undang, perolehan, pengurusan aset, pengurusan hasil cukai, program peningkatan sosioekonomi, pertanian, infrastruktur, ICT dan pengurusan syarikat.
4. Seperti mana yang terdahulu, Ketua Jabatan yang berkenaan telah dimaklumkan terlebih dahulu tentang perkara yang dilaporkan dalam Laporan Ketua Audit Negara untuk tujuan pengesahan. Bagi membolehkan tindakan pembedahan dan penambahbaikan diambil oleh Ketua Jabatan berkenaan, Jabatan Audit Negara juga telah mengemukakan 112 (Kerajaan Persekutuan), 22 (Badan Berkanun Persekutuan) 136 (Kerajaan Negeri) syor untuk memperbaiki kelemahan yang dilaporkan.
 5. Perbendaharaan Malaysia juga telah mengeluarkan Laporan Maklum Balas mengenai Laporan Ketua Audit Negara Tahun 2013 yang memberikan ulasan/tindakan terkini daripada Ketua Perkhidmatan terhadap isu-isu yang dilaporkan oleh Ketua Audit Negara dalam Laporan Ketua Audit Negara.
 6. Kandungan Laporan Ketua Audit Negara Mengenai Penyata Kewangan Dan Pengurusan Kewangan Tahun 2013 Serta Aktiviti Kerajaan Persekutuan, Badan Berkanun Persekutuan Dan Kerajaan-Kerajaan Negeri Siri 3 serta sinopsisnya boleh dilayari dalam Laman Web Jabatan Audit Negara di alamat <http://www.audit.gov.my> mulai 10 November 2014. Sebarang pertanyaan lanjut/pandangan mengenai Laporan tersebut bolehlah

dialamatkan kepada [Warkah Untuk Ketua Audit Negara](#). Cakera padat (CD) yang mengandungi Laporan Ketua Audit Negara Tahun 2013 serta Laporan Maklum Balas oleh Perbendaharaan Malaysia turut diedarkan kepada pihak media pada hari pembentangan di *Coffee Room*, Dewan Negara, Aras 1, Bangunan Utama, Parlimen Malaysia. Laporan-laporan ini hendaklah dibaca bersama untuk mendapatkan kedudukan terkini isu-isu yang dilaporkan oleh Ketua Audit Negara.

7. Satu sesi *townhall* bersama media mengenai Laporan Ketua Audit Negara ini juga akan dilaksanakan pada 12 November 2014 (Rabu) di Auditorium Perdana, Angkasapuri, RTM pada jam 10.00 pagi. Sesi *townhall* ini akan dihadiri oleh Ketua Setiausaha Negara dan juga Ketua-Ketua Setiausaha Kementerian dan semua pihak media dijemput ke sesi tersebut.

Ketua Audit Negara
Malaysia

10 November 2014